



天狗熱

這滿入梅地，天時熱到仔毋著，雖然氣象報告不時發出新消息，哪日哪日會開始落雨，雨會落在哪位哪位，毋過，天變一時，佢識看過隔一條街，一片係落大雨、一片係出日頭哦！愛講氣象報告無準，也實在罵毋得哪！就係恁仔，有時節落過雲雨，下晝頭莫莫風就一大片烏陰，落一陣大雨，晒在外背个衫褲都赴毋掣收起來；有時節落日頭雨，看等日頭恁烈，嘎又拚大雨，騎車仔个人正愛停車仔下來著水衣，雨又停地哩，蓋像天公挑事攏人哦！大家望落雨，地泥个熱氣也冲冲走去，感覺著過涼爽兜仔，毋過，蚊仔乜變啊蓋凶，係坐等、企等一下仔無停動，蚊仔就來叨人，擗啊去全全血哦！實在得人惱！

恁仔有落雨个又熱又溼个季節，係蟲仔、蚊仔最好(hau)个繁殖時間。在高雄，每一年都愛操煩个天狗熱，就係幾種蚊仔帶等病毒遛个。恁多年來政府有經驗，知啊愛仰仔防治蚊仔正著，無想著今年高雄會有本土个天狗熱病例！遛著天狗熱个人會發燒，燒到一等高，會感覺陣寒陣熱；會全身骨頭、關節痛，痛到骨頭會斷核去个樣仔；會日珠眶痛，像痛到頭那殼裡背樣仔；有兜人還會出細疹仔，歸圓身都盡虐削。醫學研究講，天狗熱有四種病毒，遛著天狗熱个人，假假症頭會定定仔好起來，也會對該種病毒有抵抗力。毋過，該人係又遛著別種天狗熱，就有可能變成出血性个，症頭就會一等嚴重，也有可能會死核。

蚊仔會遛蓋多種病，會遛天狗熱个蚊仔，好生卵在清淨个水肚，淨一息息仔水就罈擺。故所，像食凉水个杯仔、罐仔，花盆仔底下个盤仔，樹樑个細空，車仔拆下來个輪仔裡背，做工程奔東西个篷布打褶該跡位，地泥个水窟，這兜落過雨愛遽啊同裡肚个水清核，蚊仔正毋會在該生卵。學校、公司、大樓係有魚池仔，裡背做得畜兜大肚魚仔，來食蚊仔卵。過來呢，因為天狗熱係法定个傳染病，假使屋下附近有人確定著著(cog do)天狗熱，衛生局會共快派人來射藥仔，照規定定著愛開門配合做防疫工作，無斯會罰錢哦！

蚊仔細細隻，想愛莫界叨，平常做得著長袖、長褲，噴一息防蚊仔水，屋下做得裝紗門、紗窗，睡目个時節吊眠帳。最重要个預防方法還係莫界有生卵个所在，故所，固定每一個禮拜愛一哪仔巡巡啊，有水个罐仔、盎仔、盆仔、桶仔，都愛搓淨、覆燥來，水溝仔清清啊，分水流停動，垃圾拚掃淨俐，地下室有積水愛抽昇燥，蚊仔就屏無哪去，也無好生卵地。希望大家人共下來注意環境衛生，莫分病毒有機會威脅佢等个性命。

作者：吳秀梅

☆詞彙學習☆

【天狗熱】tien' gieu` ngiad：登革熱。

【入梅】ngib moi'：進入梅雨季節。

【過雲雨】go iun' i'：西北雨。

【莫莫風】mog mog fung'：突然的。

【挑事】tiau' sii：故意。

【擗啊去】biag a hi：打下去。

【一等】id` den`：非常。

【假假】ga` ga`：大多。

【篷布】pung' bu：遮陽擋雨的帆布、塑膠布。

【大肚魚仔】tai du` ng' e'：大肚魚。

【射藥仔】sa iog e'：噴藥。

【一哪仔】id` nai e'：到處。